

摘藻堂四庫全書薈要

集部

欽定四庫全書薈要卷一萬六千四百六十

集部

禮部集卷八

元 吳師道 撰

律詩

奉安仁山金先生神主二首

我里堂堂有碩師窮經白首竟誰知諸君宣化文明運
百世風流道德祠鄉曲論公身歿後衣冠色動禮成時
服膺私淑遺編在豈乏方來秀傑姿

又

仁山山下故書藏，上泝真傳自紫陽。
策秘當時桑海變，道行異世日星光。
先生永配千年社，學子濃熏一瓣香。
端藉廣文崇敬寺，相看_二不恨鬢毛蒼。

和鮮于伯機舊題柯山韻

樹古崖深畫景冥，仙橋有路上神京。
洞門呀月青霞出，鯨背撐空白浪平。
須信地靈鍾異質，誰令樵客擅修名。
千年太極無窮意，騰說紛紜笑老生。

于壽道興崇徽國文公祠宇之盛

闕里名存第宅非斯文天為啓良機禮崇盛德千年祀

功比侵田一日歸故井土消泉激激

嘗聞
所銘井

南街春動

柳依依溪山光景元非昨想見神遊憶佩韋

萬里清風堂宴集呈壽道知州孟威郡帥

二月高堂酒滿杯梅花雪落杏花開文章太守羣僚集
弓劍元戎小隊來四座清風談未了萬山斜日首重回
客遊謬忝嘉賓列愧乏鄒枚賦咏才

衢州超化寺

前朝老屋半傾欹尚想諸賢會集時
閣外雲山天歷歷城頭風雨草離離
渡江疋馬空成夢印雪孤鴻自足悲
賴是同行非俗子僧寮借紙錄殘碑

大宋南渡後朱希真汪玉山范元長

嘗寓於有雲山閣張巨山作記今摧敗不可登臨矣

寄題永康上安寺三峯閣峯名淦竹石柱後塢永康縣名花溪

道家浪說蓬瀛山何如此地三峯環
竹岩石柱秋落

花溪雲塢春潺潺旁通異景人莫測中有高閣僧獨閒
我居不遠二百里今當一往窮登攀

謝宜春易芳猷帥聞見寄詩

同上燕臺記昔年重遊兩髯各蒼然升騰大府方飛剡
拓落微官漫草玄驛有使攜雲樹句門無人候雪溪船
浮生聚散何須論仰止芳名宇內傳

送人之宣城并寄諸故舊

我離宣城已五年送子行邁心茫然鹽車驥耳空自笑

雪泥鴻爪誰知憐溪山到處足清絕冠佩祇今多俊賢
游從定應得真樂莫惜頻寄新吟篇

正月五日大雪連日寒凍不出

殘冬兩度聽驚雷新歲陰寒雪作堆病客老容仍頓至
荒山春色幾曾來冰蠶滿貯加飡飯松火頻添細撥灰
最憶二兒同笑語五更孤枕夢初回

送人歸婺源

勇隨東帛出山來仍逐雙鳬並路回廢院俄驚鎖秋葉

荒田應夢長春苔稻梁屑屑非高志
榱桷森森總異材
吾道未窮先哲在紫陽千仞鬱崔嵬

重過齊山清溪

翠微曾與客同遊陟險搜奇興未休
八載重來驚老大
十年高咏想風流雲迷複嶺深藏洞
水落寒江遠見洲
安得符離張太守畫圖再與寫清愁

山行即事

穿雲渡水百盤迴身在青紅錦繡堆
野老怪人沖雨過

牧兒疑我看花來山林自是平生志
州縣原非健吏才
但得翳桑無餓者不妨歸卧守蒿萊

寄題留山道館

幾處燒丹詫葛翁留山今復見新宮
神仙自愛無人識樓館誰令有路通
碧水帶花來洞口玉笙隨鶴度雲中
更尋履石依稀迹轉覺幽深興未窮

葛公坑山水幽邃有石上履迹

送陶生之江西二首

大江西上好青山曾記輕舟一往還
翠袂小姑煙雨裏

白頭五老霧雲間
子遊仍反春風早
我夢寧如昔日閒
應過柴桑懷爾祖
十年高節杳難攀

又

憶昔洪都與勝遊
桂花莊上共鳴騶
鎖深廢院書聲斷
劍化空函寶氣收
往事十年春夢變
斯文千古大江流
西山晴翠東湖月
應有幽人遲子留

送師剛中萬戶二首

閩南小寇敢披猖
藩府新開選帥良
中道已聞蠻黨靜

回車復見羽書忙
總戎嚴令風霜肅
報國丹心日月光
此事正堪談笑了
春和歸誦採薇章

又

秋浦飛鳧倦欲回
忽聞萬騎自南來
愚民驚向荒山走
拙令喜逢青眼開
禮樂詩書曾壁水
功名圖畫合雲臺
早聞吉語東風裏
戲彩庭前奉壽杯

寄交代辛仲剛

一泓清白鏡重開
更築新亭記老梅
千載前賢想遺烈

三年舊令愧非才，應須花木春添種。
莫遣牛羊夕下來，深護扃閑驅俗子。
登臨元不為銜杯。

和友人惠韻

交情落落曙星稀，心事悠悠倦鳥飛。
佳友每欣連榻話，俗兒偏笑載書歸。
淮山江水風吹夢，寒食清明雨濕衣。
白髮相看一樽酒，不妨秉燭對餘暉。

題吳教授重陽詩遺墨就用其韻

秋風老菊尚餘香，誰信吟詩近夕陽。
營家子收遺藁墨。

傳經人覓賜衣黃州來南裔雲仍冷香水東流日夜長
泪落緘題孤宿約去年空過鄭公鄉

佳山水亭

百年老屋半蒼苔一日佳哉舊觀回浮世何曾改山水
高懷聊復寄亭臺夜深漁艇簷頭宿日落僧窓竹裏開
此去京華踏塵土時時還有夢飛來

送人之開化縣幕

我亦曾為縣邑官賓僚每歎合并難幕中婉畫能交贊

堂上清琴坐可彈
露窖雲屯黃穉楹
杉幢秋擁碧巔岿
送行還憶經過地
珍重諸公各勸餐

春陪李惟中司業同年赴京至彭城而別

使華移焰辟雍流
末席何期忝見收
二十年前依虎榜
幾千里外逐仙舟
黃樓同上還分手
紫陌重迎尚及秋
又報奉常新命下
早修儀註贊皇猷

九月初旬臨清下陵州舟中

誰云北土異南方
九日晴暄未隕霜
河水渾黃千里疾

柳陰濃綠兩堤長豐年有象占農畝佳氣非煙望帝鄉
駟酒一升猶可飲祇愁無客共重陽

靜復堂

震雷初動復為元能見天心本靜存夜氣清明守靈府
春陽消息認孤根披圖細玩先天奧問道深懷立雪門
莫以佳名事觀美化機妙處不容言

碧筠軒次韻

賸栽修竹拂春雲為愛堅貞節獨尊食肉可能醫俗士

垂綏莫共乞天孫清風繞屋笙琴響翠霧侵人几席間
想像茲軒元未識題詩先到楚山根

寄題紀信廟

貌齊隆準伏危機辦為君王解急圍楚炬無情燎黃屋
晉城有土瘞遺衣功名不與山河誓義烈終同日月輝
新廟落成牲醴盛千年魂魄想依依

晉州有冢

送俞巡簡之邵武朱口

坐厭寒氊作廣文忽騎快馬號將軍民安樂土元無警

士有通才故不羣折柳都門三月雨看花山寨萬重雲
武夷溪曲應相近為我馳書問隱君

送徐縣丞之夏縣

馬公鄉裏去鳴琴送別因風感慨深此日大夫花滿縣
當時丞相布為衾朝廷每尚廉平政父母誰無愷悌心
愧我不才曾作邑相逢祇誦古人箴

送鄭知事之杭州

寒食匆匆不少留故人相送出皇州喜聞南國蓮依幕

乍識西湖柳映樓
知已定逢臺閣彥
清才寧混簿書流
是邦凋瘵今非昔
好與黃堂贊運籌

送張縣尹之孝感縣

十年前燕杏園東
此日重來踏軟紅
得意方為萬家宰
題詩仍醉百花風
慈恩姓字氛埃表
雲夢衿期浩蕩中
媿我不才曾學製
欲談舊事惜匆匆

蕭存道元帥平雲南頌後題

長槍大劍壓毛錐
却虜人言底用詩
誰似頌聲騰北闕

更兼威畧震南夷十年尚記先朝事
萬里重迎大將旗
今日綏懷銷戰伐莫嫌無路獻雄詞

送劉伯溫之浙江省郎中

江浙連閩屹巨藩年來民力見凋殘
帝憐下土驅豺虎
人賀南州集鳳鸞槐影晝籠青
瑣闥湖光晴焰晝闌干
清風迅掃諸曹務應共賓僚一笑歡

送陳道士歸龍虎山

誰云學道出人間親在高堂髣髴髮班
萊子寧忘身戲彩

張侯應夢手持環
神仙天上辭珍館
煙雨江南望故山
獨羨相知老宗伯
連章珠玉賁林關

端午

今年重午住京華
一寸心情萬里家
楚些祇添當日恨
戎葵不似故園花
案頭新墨題紈扇
牆外高門響鈿車
朋侶蕭疎歡事少
誰令衰髻受風沙

送曾貫還江西應舉

桂花莊上昔年遊
送子曾偕計吏秋
望氣此邦終得劍

濟河今度決焚舟興文已信關天運積學深期為道謀
京邑相逢乍分手春風遲宴曲江頭

送高知事之道州

元子輕徭減稅租陽公遺惠及侏儒頻年未息山夷警
今日誰分刺史符溪上訪賢談太極雲間懷古叫蒼梧
佐僚喜得詩書彥從此疲民盡少蘇

送顧縣尹之安豐致意舒穆魯書庵

鼓篋曾陪胄子遊青衫初着盛鳴騶
桁楊卧雨公庭曉

杭稔連雲田舍秋今日淮鄉真樂土古來仙吏屬清流
詩書萬卷庵中老問道應知不遠求

次韻張仲舉助教上京即事六首

海波填碧湧金鰲當日經營得俊髦周鼎卜年開帝業
漢都作鎮奠神臯宮中雙鳳朝扶輦帳下千牛夜捉刀
萬國會同時肆覲衆星遙共北辰高

又

大駕時巡鎮北庭皇風萬里暢威靈有年太史仍書雨

卜日祠官已祭星
白草黃雲秋漫漫
朱樓翠樹晚冥冥
南歸却作灤陽夢
應是平生舊所經

又

翼翼行都歲幸臨
名王諸部集如林
璫車滿載彤庭帛
寶馬高馱內府金
暮散歌呼灤水上
夜騰光氣黑山陰
世皇謨畧真宏遠
共感湛恩到骨深

又

虎賁猛士羽林兵
繚繞宮垣帶雉城
土冷水泉長凍泣

天低星斗倍光精
穹廬區脫雲彌野
馬湏醅雪到觥
巷北巷南歌吹襍
祇應儒館自書聲

又

聖主恭勤服澣衣
頻年羽獵罷連圍
金華勸講延髦士
紫殿親祠却宓妃
調鼎有功神化密
扣門無事諫書稀
高秋八月時巡畢
還與都人候六飛

又

孔鸞歛翅久盤迴
延閣穹崇際復開
四海宣文千載仰

兩生接武一時來
紬書共啓緘金匱
持筆行登視草臺
努力深期報知己
明時肯負出羣才

聞危太朴王叔善除宣文閣簡討四首

陰山分脈自崑崙
朔漠縣延迴北門
遙見馬馳知牧地
時逢水草似漁村
穹廬勅勒秋風曲
青塚嬋娟夜月魂
今日八荒同一宇
向來邊檄不須論

又

兩都賦意入經營
今日奇逢有此行
弟子絃歌臨壁水

諸公篇翰出承明眼中高闕祥雲色夢裏空齋舊雨聲
千里相望勞問訊追扳無路若為情

又

亭障連山入杳茫
羶車如雪漫沙場
雕盤天際秋雲白
雁去關南木葉黃
獨客應憐冠戴楚
閒愁無奈管吹羌
歸來若度桑乾水
莫忘并州是故鄉

又

藻水縈迴草滿川
皇都佳氣鬱浮天
端門高映雙龍闕

馳道中容萬馬韉羣后承恩歌湛露從臣待詔賦甘泉
更聞所過蠲租稅田野清平樂晏眠

寄題趙仲明霞披亭

雲石曾營雪水傍霞披更出弁山陽東風桃李紅成陣
晚炤桑榆綠作行落筆時時爭吐燄浴丹夜夜共浮光
書來特詫新亭好飛佩何當與頡頏

送傅士開總管之饒州

留衛行都已奏勲又驅五馬向江雲傳岩人合登台輔

番國民方仰使君入篋南金無乏貢莫居陽鳥不驚羣
向來曾是諮詢地治績應須早上聞

送孔用道都事之山東憲副

聖師宮宇魯東方出使文孫遠有光臺上霜華隨馬白
庭前檜色炤人蒼惠文未必妨吾道衣繡從來羨故鄉
獨恨此時知己別素心千里重相忘

至大庚戌黃君晉卿客杭與鄧善之翰林黃松瀑
尊師儒魯山上人會集賦詩今至正辛巳晉卿提

舉儒學與張伯雨尊師高麗式上人會再和前詩
上人至京以卷相示因寫往年所和重賦一章

後先人物一時雄心迹寧須較異同來此清談散花雨
依然舊夢聽松風畫圖長共湖山在劫火頻驚殿閣空
萬里忽逢東海客前詩重寫思何窮

十二月廿四日至廿八日崇文閣下試諸生和仲
舉韻

黃昏庭樹亂烏號門外紛紛散白袍卷地風來華燭滅

半空月上赤闌高
氷花看硯凝寒玉
茶乳番瓶響夜濤
衰老強陪豪俊列
不堪鄉思正如毛

楊氏水北山房

楊君水北山房住
想見蕭然遠世紛
茅屋秋風墮黃葉
燕泥春雨浣玄文
爭傳圖畫京師看
未羨聲名幕府聞
我欲相從好兄弟
釣槎吟石肯平分

先天觀

誰開岩障作仙家
龍虎宮前路不賒
珠現寶光懸黍米

鼎分真火養丹砂玉笙夜度雲間鶴碧水春流洞口花
欲問先天易中事希夷何處卧烟霞

餘干張氏讓堂

同居九世古稱義六世讓財今更敦終身不失一段地
此族尤宜雙表門里中時有鳳凰集堂下春來花樹蕃
所忻異時激頽俗我亦泰伯州來孫

題曹士弘文後前蘭溪巡檢

起家刀筆儒為吏隨世功名武換文爾輩安知良太史

吾鄉猶說故將軍百年諸老零秋葉四尺孤坟黯暮雲
賴有賢郎能競爽將遺藁播清芬

送稚勒呼正卿福建鹽運司同知

奎閣清光趁翠華玉墀微步響冲牙却遊萬里梅花雪
又看三枝荔子霞國計從來資海鹵皇恩難得到天涯
使君篇什多風雅先與疲民洗嘆嗟

送毛道士歸先天觀

身共閒雲暫出山就攜詩卷借人看不隨方士留燕土

還與仙翁守漢壇
花落鶯啼春日暮
天空鶴去曙星寒
瑤宮縹緲無由列
別後誰從說弄丸

城外見杏花

曲江二十年前會
回首芳菲似夢中
老去京華度寒食
閒來野水看東風
樹頭絳雪飛還白
花外青天映更紅
聞說琳宮更佳絕
明朝攜酒訪城東

王仁甫左丞閒閣

試向宜閒亭上坐
靜觀物理笑勞勞
風生秋水停紈扇

雨足春畦罷桔槔碧水自隨鷗泛遠白雲偏共鶴飛高
向來軒冕紛華夢此日全輕似羽毛

題盧溝雨別圖送張道士

盧溝橋邊柳色齊盧溝河畔草萋萋東風故吹靈雨送
北闕為有天香攜飲闌水榭見花落路入煙村聞馬嘶
後月歸來重經過五雲却望鳳城西

南臺趙子威照磨母氏眉壽堂

高堂此日拜龐眉家慶相傳事更奇戲彩佳兒來栢府

獻桃阿母下瑤池雲煙色動金花誥雨露香生玉樹枝
儘釀中山千斛酒仙遊遐景正無期

次韻柳待制直院晚歸二首

庭松吐燄引凌霄露井銀床凍不消雲霧窓深隔風日
鳳凰聲集和簫韶書成給札分曹寫直罷攜香滿袖飄
自昔詞臣宜白髮禮賢珍重此時招

又

卑飛無力到煙霄憂患侵凌壯氣消得食侏儒偏笑朔

獻嘲弟子豈知韶天憐病目今年減雨送涼思昨夜飄
無補明時合歸去山中休待故人招

送孫生歸豐城

十載成均尚褐衣論詩豈是賞音稀羣英雜遝歌清廟
獨客飄飄賦式微劍氣秋成遙入望書燈夜屋耿留輝
白頭倚席成何事回首南雲亦合歸

送揭生浩侍父南歸

白首詞臣出帝畿翩翩之子一時歸夜光匣裏雙神劍

春水船頭五彩衣
胄學新功存簡冊
人生至樂在庭闈
誰知惜別情偏切
目斷江雲日暮飛

元夕感懷

天街疊鼓鬧香車
官舍荒園宿暝鴉
不飲閉關宜謝客
無眠對月轉思家
三年元夕留京國
六十衰翁感鬢華
江上春風後期在
爛燒銀燭對梅花

清明

清明頻歲客天涯
歸愛江南好物華
煙煖人家插楊柳

雨晴門巷掃桐花誰憐卧病春將過強起哦詩日又斜
杏酪不須持餉我自燒新火試新茶

五言絕句

客有談獻玉絕絃事因賦二詩

荆璞寧非過下和猶識真識真不自保翻恨世無人

又

識趣全琴在賞音千載期朱絃何用絕自貴不求知

贈王月屋相師三首

威儀諒有則彩邑寧非天開口問窮達紛紛事可憐

又

我貌不足數我心當炯然請君視此屋晴月光無邊

又

圭革四十年忽有萬里行會看憶君言一笑春風生

謝氏友山圖二首

逶迤漫相逐偃蹇自難親之子與為友此山能擇人

又

幼輿山岩姿安石丘壑情復見佳子弟使人增眼明

嘉定黃氏瑞竹二首

埭川誇瑞竹黃氏見高門富麗應如此時來豈有根

又

曾聞寇公竹插地竟成林勿謂彼非瑞清風猶至今

雨竹圖

千年舜妃泪一幅湘川雨掩卷不忍題余心正懷古

畫兔

孕靈廣寒府承寵中書署誰令秋水邊弄月淒風露
贈內靜子

止水還能照死灰寧復然寄言內靜者求靜莫令偏
促織圖監州貫子素徵賦

華屋歌鍾夜何從識草虫惟應苦吟者相對共秋風
東津暮泊二首

人家煙霧裏燈影樹林間撐空青突兀知是烏龍山

又

四山斂暝色百虫沸哀聲夜久月未出川光虛自明
錢舜舉畫卷二首

不向東風開酣霜拒秋冷紅白為誰妍自照滄浪影
又

秋露滴金杯秋風吹道衣陽光澹欲出相向獨依依
讀左傳偶成

勝母不可入栢人寧肯留胡為如死鳥更有在乾侯

山川圖

白雲映高樹上有青青山不見幽人居應在空濛間

淵明像

靖節有高超沉冥非酒徒畫師寧識此偶出亦攜壺

竹圖

透石迸新芽清泉映涓翠姿妍競陽春勗哉歲寒意

環翠亭

萬山鬱環合高亭一振衣拂衣下山去帶將空翠歸

鷺

振振風生柳沾沾雪點磯白攢秋水立青映暮天飛

蓮藕花葉圖

玉雪竅玲瓏紛披綠映紅生生無限意只在苦心中

溪山雪霽圖

橋凍驅驢滑灘漸理棹難何如閉門者不識風雪寒

正月六日離建德道中雜咏三首

前年踏雪來今歲踏雪回天知我囊空從以萬銀堆

又

深村出簫鼓草市亦燈火元夕約到家人應候我

又

荒山與峻嶺千轉復萬盤巍然金華出使我心平寬

畫松

風霜不改色水石淡為隣祇合空山老豈知人世春

題李盤泉卷

山中百歲老曾見辟雍流懶說前朝事清泉照白頭

小竹石圖

千畝蔭渭川萬仞峩華嵩兩竿卷石間蕭蕭亦清風

六言絕句

水西道中

鳴鳩林外葉密眠犢沙頭草添春水石橋紅杏夕陽茅
屋青帘

仙居圖

雲氣參差青嶂樹林飄緲飛樓誰識仙家歸路桃花流
水漁舟

江湖八境圖

洞庭

君山隱隱暮碧洞庭渺渺秋波羈客白頭懷古湘靈莫
奏雲和

武昌

草生自識春洲月滿誰登夜樓寂寞漢人文賦蕭條進
士風流

廬山

香爐峰看飛練栖賢峽聽奔雷三疊谷簾未識至今却
悔歸來

海門

多景樓前狼石浮玉山下中泠長江天險安在北固煙
光自青

太湖

雲樹煙波浩渺漁村橋里縈環想見三高不死超然來
往其間

浙江

兩山噴雪眩轉三道奔濤淼漫白塔故宫高殿行人來
倚闌干

靈隱寺

平地琮堆翠浦何人鬼刻神剝會有風雲震蕩再還前
日飛岩

西湖

花柳空濛春霧蒲荷淡蕩秋暉水光山色長好舞榭歌

臺易非

題水竹小景二絕

鐵樹霜藤崖壁藕花蒲葉汀洲更著蕭蕭水竹有人傲
兀扁舟

又

修篁煙景濃淡遠樹人家有無此日亂山深處喚回迷
夢江湖

題高彥敬越山圖三首

漁浦渡頭煙淡錢塘江上潮平吳越興亡何在青山長
對人橫

又

潮平風定日落雲白山青雨乾憶得晚秋天氣浙江亭
上凭闌

又

西域有茲奇士東州無限佳山一幅西興漁浦風流千
載人間

山水小幅

蒼嶂秋雲更白青
林霜葉偏紅
江南八月九月人在詩
中畫中

即事

殘書長日茶思高
屋清風誦聲青
荇池邊飲馬綠槐陰
裏聽鶯

禮部集卷八

謹案卷八第十頁後七行舒穆魯舊作石抹今改
後仿此 十六頁前三行雅勒呼舊作雅琥今
改





總校官庶吉士臣侍朝

校對官檢討臣王鍾健

謄錄貢生臣蘇曰柄

欽定四庫全書薈要

集部
禮部集卷九

詳校官助教臣謝登雋



欽定四庫全書薈要卷一萬六千四百六十一

集部

禮部集卷九

元 吳師道 撰

言絕句

山行

林中禽語意相關池上魚遊心共閒忽到水窮雲起處
悠然回首見南山

桐江道中二首

東風綠水動微波
晚泊灘頭理釣蓑
喚起江湖昔年夢
一帆寒雨聽漁歌

又

連山紅綠照清溪
倚棹行人思欲迷
多少寒禽好音語
止嫌杜宇作哀啼

病起

單衣小立却西風
病骨詩愁冷淡中
一片清秋在何處
豆花籬落雨濛濛

追涼書所見三首

小風不掃晚來雲
天色澄澄紺碧痕
回首銀盤孤湧處
火峯化作雪濤奔

又

沙渡歸人已罷船
石樓遙樹自生煙
溪回路轉知何處
一塢斜陽數萬蟬

又

涼風瑟瑟響千崖
漸出平原草樹開
欲墜飛螢已無力

瞥然數丈過池來

秋江晚渡圖

十年吳楚客西東
展卷高歌興未窮
渺渺孤舟呼不得
好山無數夕陽中

煙寺晚鐘圖

半空孤塔擎飛杵
四壁長煙漲白波
落木疎林秋色老
斷鐘殘磬暮樓多

郊行

浴鳥翻晴日色暄平蕪千頃豁春煙何時擺落窮愁事
濯足清江藉草眠

杜鵑

春風望帝寂餘魂臣甫離愁錦水濱千載此禽同姓杜
哀吟垂血定前身

元夕

柳臺梅巷鎖春晴酒思燈光負賞心聽徹宣和太平曲
獨看明月到更深

赤松二仙圖

四海弟兄誰慰眼
半生書冊政亡羊
赤松有路不歸去
花落春山百草長

夏夜江上二首

繞屋清江竹萬竿
水風蕭瑟竹光寒
夜深月上門不掩
卧聽釣歸船過灘

又

洪濤半夜發前山
月明風急魚龍翻
呼兒江邊縛艇子

蒼藤白石青楓根

溪上

柳花漠漠杏花乾一寸青蒲刺碧連
春色滿溪人不到
野鳬背上小雛眠

次韻黃晉卿清明遊北山十首

千峰煙雨亂崢嶸
中湧芙蓉一朶青
想見登高能賦客
吸呼山氣聚英靈

又

幽賞玄談總背時
青山自識我曹奇
不知同結束林社
還有當年遠法師

又

蘭若青林數里程
孤峯當道送還迎
歸來寒食清明夜
猶夢松風澗水聲

又

珠懸黍米容千衆
芥納須彌等一塵
始信約師瓶浴事
故將靈幻駭庸人

又

煜煜丹光澗壑紅
牧羊先在嶺雲東
赤松花落春風老
未得相逢一笑同

又

仙佛偏于勝處多
飛空金碧倚我我
白雲深鎖藏深屋
誰記北山人姓何

又

林間尊宿淡衿期
不減當年許與支
十載相思不相識

雲山應笑俗緣卑

又

藥草生苗宿雨微
梢梢野筍脫斑衣
桐花開盡櫻桃過
山北山南謝豹飛

又

行歌共訪採芝翁
絕壑層雲一盪胸
誰念愁吟溪上客
落花微雨獨攬筇

又

一壑風煙自可留十年湖海漫狂遊短衣射虎真堪樂
莫恨將軍老不侯

輓車圖

短轅長馭後先驅逐利奔名恣所如落日中原天萬里
我貧正坐出無車

讀陳后山詩有感

我名異世偶然同身迹沉微轉更窮寄食尚憐從郭曄
賞音未易見蘇公

和陳景傳寄方韶父韻四首

北里高樓笛夜吹
酒懷詩夢與秋宜
惠連無限淒涼思
獨背寒燈聽雁時

又

風流文采弟兄難
落月懷人幾夜闌
俗子寧堪懷牘對
俊游聊作採詩看

又

黃塵那解污清流
客裏千尊莫負秋
閒采芙蓉弄江水

笑攜涼月上沙頭

又

風流遺老曙星殘
湖海知心夜夢間
欲訪玄英向何處
猿聲木葉滿秋山

山雞

爛斑五色出深叢
顧影徐行氣自雄
飛去漢廷應作鳳
野人慣見任西東

偶題

塵土侵懷屋打頭出門市道總悠悠南山萬古長青眼
莫怪相看不下樓

明皇聽笛圖

小立華清院宇春側身橫玉笑迎恩秋風吹斷歡娛曲
凝碧池頭急管喧

羣雁圖

飛影成行止共餐稻梁易足水雲寬誰知江海離羣客
獨對秋風不忍看

孟浩然跨驢圖二首

風雪蕭蕭破帽欹玉堂回首夢應非
鹿門松徑寒山裏擁被微吟定憶歸

又

直語無因住禁垣清游隨意躡寒原
風流鄭五雖相似應愧詩庸位轉尊

班姬吟扇圖二首

已信當年有綠衣漫將團素寫新詩
才明自斷哀榮夢

肯對西風作闕悲

又

當暑提攜識暫憐
安身篋笥任長捐
昭陽極寵昭臺怨
得似斯人晚自全

息齋墨竹三首

長憶東陽舊使君
秋風吟倚瘦休文
石根數葉蕭蕭碧
長伴幽人一壑雲

又

碧鮮迎舞翠華臨一日清風滿禁林得士雖聞諸老薦
報恩誰識此君心

又

彭城一派接洋州千載真傳屬薊丘舉世隨風翻關水
凝神誰識與天游

春日獨坐二首

茶煙澹澹風前少庭葉沉沉雨後添何處楊花念幽獨
殷勤入室更穿簾

又

幽禽着樹一兩語
小雨隨風十數番
無酒無詩亦無客
澹然終日自清歡

次韻七夕二首

織女黃姑有定居
河梁底處度空虛
世兒擾擾寧知此
應笑書生苦信書

又

流俗無知祇陋愚
矜能于道亦浮虛
隣衣自富何關我

不用逢人詫腹書

除夕

瘦竹蕭蕭一樹梅
閉門俗客少曾來
明朝遮莫新元日
不用山童掃雪開

昭君出塞圖二首

平城圍後幾和親
不斷邊烽與戰塵
一出寧胡終漢世
論功端合勝前人

又

巫峽故山花樹紅
村村婚嫁樂春風
琵琶馬上無窮恨
最恨當年誤入宮

楊妃上馬圖

花擁金鞍步步遲
君王別殿待多時
延秋門外驚塵起
夜半無人見疾馳

秋日二首

酷暑煩蒸日望秋
耳根恨不聽颼颼
夜來庭樹秋風起
獨覺却添無限愁

又

少時倔強不知愁每笑詩人嘆白頭四十行年還自笑
風前梳墮一莖秋

霓裳圖

一曲霓裳衆樂催相傳親聽月宮來當時果有飛神術
末路因何厄馬嵬

即事三首

日炙風吹野岸傍形容塵土汗如漿平生三伏寧知此

高竹當門獨倚牀

又

解衣坐憇野人家滿樹紅茸夜合花
河水悠悠纓可濯
我來非是羨魚蝦

又

離家始識家居樂涉世深知世法疎
豈是一行能作吏
已慚數月廢觀書

堯民醉歸圖

騎行巾服俱非古儀狄以前誰飲醇
寫出太平真樂意陶然如此即堯民

七夕

木槿籬邊絡緯哀卧看河漢遶天迴
西風不管扁舟客吹下樓頭笑語來

春暉堂

草心何足報春暉游子遠游歸更遲
甘旨高堂日娛養願君不識孟郊詩

芙蓉翠羽圖

一幅宣和舊畫圖芙蓉紅擁翠禽梳龍沙萬里秋風道
此景君王夢見無

紫極宮太古圖

突兀眼前安得堅人生變幻等飛煙混成有物知誰識
長向千秋萬古傳

漁樂圖

罾網縱橫來去船老妻含笑小童顛旁人競羨漁家樂

不道羣魚正可憐

吳城山阻風

吳城堤下放船初
津吏催程畏簡書
却謝北風多雅意
留人兩日看匡廬

留李王河驛

宦況不如歸興濃
何人知我愛疎慵
江濱荒話三更月
聽說松楊外酉峯

集句二首贈答潘季通

江上春風送客舟
鳥啼花落水空流
勸君更盡一杯酒
與爾同消萬古愁

又

梅花梨花參差開
如何不飲令心哀
百年便作千年計
二月已破三月來

還里二首

鄰屋荒塘巷陌非
故廬在眼獨依依
祝融回祿偏憐我
莫恨知心一世稀

又

東家滿裝千斛船西家腰纏十萬錢我歸無物堪誇客
方寸夜光長炯然

寒村雪暮圖

木杪栖鴉景已殘沙邊落雁雪猶寒江南江北曾行路
今日山窓借畫看

桃源圖

翠嶂清溪遠近春柴荆雞犬接比隣花開酒熟身無事

便是桃源畫裏人

玉潤禪師山水

玉潤詩多畫上題如何此畫不題詩
依稀樹石皆遊戲
一筆全無却更奇

雨中即事

山雨冥冥水滿溪倚闌望斷轉淒迷
黃鸝不管人愁緒
盡日高林相對啼

贈醫者陸生

三十年前識乃翁
鳴絃醺酒近隣東
閉門秋院梧桐雨
却話人生如夢中

邯鄲灼黍圖

勇棄功名一覺餘
千年重有此翁無
昏昏醉夢人間客
爭向君家看畫圖

大洋灘

漠漠青煙障白陂
達船千百雁聲悲
喚醒羈旅十年夢
似泊高沙湖裏時

凍蠅

僵不能飛靜若痴忽敲窓紙戀晴曦
主人偶見猶憐汝不念營營擾擾時

題陶士元雙溪櫂歌二首

綠蓑青蒻老玄真流水桃花曲尚新
故里雙溪誰復識櫂歌今喜見斯人

又

漫郎孤唱發清妍甫里豪吟思傑然
更聽正音韶濩曲

武夷山上有飛仙

蘭亭圖二首

京洛銅駝草莽深
春風修竹滿山陰
右軍憂國心如許
也伴蘭亭醉客吟

又

觴咏餘情落筆時
後來感慨已先知
山陰道士衣冠少
竹裏荒祠澗水悲

西江圖

西山翠湧大江流歷歷開圖記昔遊寂寞滕王舊時閣
秋風斜日下城頭

磧雪騎竹圖柳道傳提舉自作此圖并題其所為
詩有百年行役今如此安用文章氣吐蛇之句

自寫新篇自製圖記曾萬里從鑾輿莫嫌不得文章力
風雪詩人老跨驢

題山水圖送人歸仙居

仙居直接天台路無數青山與雲樹行人已在畫圖中

又復攜圖入山去

正月六日七日舟中即事

雨聲入夜波翻天夢回月出春風顛雪香亂落衣被濕
知是梅花吹滿船

又

江清日淨午風柔潑眼煙嵐紫翠浮楊柳未描花未動
無人來共早春舟

贈虛舟道士

我愛虛舟豈浪名無心隨處任流行
抱琴却出龍門峽
明日江湖春水生

唐陳宏畫明皇擊桐圖

三郎半醉玉顏開手戛青桐舞節催
老樹無情應解笑
曲成那得鳳凰來

贈日東僧清無夢

萬里滄溟斷去途閒雲野鶴共羈孤
祇應清夜禪床月
解炤平生夢有無

葉敬甫所得息齋墨竹為火燎其半

李侯妙畫奪天機
回祿祝融將取之
賴是清風滿盤谷
不令虐燄盡高枝

捕魚鳥

翻身舞影看重淵
百計求魚飽爾咽
巧拙並生還自足
何曾饑死信天緣

春日雜書

澹無宦況有詩情
馬上微吟太瘦生
楊柳杏花山市鬧

一番風雨近清明

是時僧志南有沾衣欲濕杏花雨吹面不寒楊柳風之句

止建德梅山寺僧四首

玉峰春色動晴煙
白白紅紅取次妍
病眼却無看花分
卧聽簫鼓度山顛

又

清明長是雨綿綿
今日晴光勝去年
山縣閉門花事過
正愁無水救春田

又

黑蟻蚕生桑葉小
河豚魚上荻芽肥
雨晴野外人聲動
吏散庭前燕子飛

又

山藥常多心共苦
案書拋久眼渾迷
舍南舍北團團樹
無奈子規朝暮啼

雨宿招賢寺二首

山路殘春已厭行
僧房今夜有餘清
岩前流水窓前雨
兩耳一年無此聲

又

招賢寺裏解招誰
笑我今年兩度來
山雨留人行不得
憂民心事有誰知

村行

煙樹交交桑扈鳴
雨泥滑滑竹雞聲
青畦白水迷漫渡
幽徑濃陰語曲行

禹栢圖

漢陽縣大別寺中

栢貢荊州任土風
漢陽遺樹尚葱蘢
休誇此是親曾植

四海青青盡禹功

梅聖俞四禽言此建德為令時作也官舍四周皆
山春夏之交禽聲喧然因感梅公詩集為一絕

餅焦亦足療朝饑止飲壺盧豈用提風雨蕭蕭泥滑滑
不如歸去去來兮

贈鄉人說相者

秋浦相看眼為開興談鄉井幾時回故吾骨相應難改
祇有新霜上髻來

題梅溪詩畫卷

淮海張公昔好奇畫圖一幅寫清溪憑誰添取詩人屋
更看梅花雪壓堤

玉腕騶圖

滿身霞彩尾蕭梢玉腕騰凌意氣驕牽向赤墀人駐目
只疑踏雪未曾消

游赤壁圖

燒天烈火萬艘空橫槩英雄智力窮何似扁舟今夜客

洞簫聲在月明中

秋江獨釣圖

我冠古服理絲綸恐是玄真輩行人今日官征算舟舫
水雲莫倚自由身

清溪道士點易圖二首

圖像堙微久失傳或從方外得先天姓名不落人間世
亦有清溪點易仙

又

每愛研硃滴露篇飄然清氣已如仙
陌人不悟姪人術
木鶴何曾得上天

子昂蘭竹圖

湘娥清泪未曾消楚客芳魂不可招
公子離愁無處寫
露花風葉共蕭蕭

揚州四首

畫鼓清簫估客舟朱竿翠幔酒家樓
四城列屋數十萬
依舊淮南第一州

又

長壕如帶故城荒
猶說英雄李與姜
唐人愛向揚州死
爾死何曾有耿光

又

后土祠前走鈿車
無雙亭上看仙葩
一年聞道開三度
不是春風玉蝶花

又

富貴驕奢志已迷
無端更欲上天梯
庭前木鶴真兒戲

況說雲中犬與雞

腰纏十萬貫騎鶴上揚州昔人以為戲言識兼得之惑蓋誠有是事也劉

安高駢是已

張子固秋泉卷

麗澤盤溪記昔游白雲人去自悠悠秋風何處寒泉路

應有清泠一勺流

曾游益之門

胡古愚後京華雜興詩

京華風物太平時瘦馬青山髻欲絲二十年來留滯客
祇應賸有橐中詩

十一月十二日崇文閣下祇試二十三日出和張
仲舉

官燭風簾徹夜明屋高人靜易寒生不知卧聽蕭蕭雪
何似山窓洒竹聲

又

棘鎖深闌夜不歸宮庭步遶月輝輝書床塵動牙籤亂
茶鼎聲喧蚓竅微

玄教堂獨坐二首

槐栢成行擁綠陰
鈎簾獨坐屋深深
日長清思無人共
祇有黃鸝送好音

又

庭下高懷葉乍張
風吹嫩綠有微香
窓搖簾動玲瓏影
付與羈人一夏涼

唐馬圖

飽食天閑逸氣生
只愁立仗誤長鳴
青絲挽入奚官手
俛首何妨逐隊行

段節婦

南國征人去不歸
春妍嬾著舊時衣
至今門外冬青樹
不與風花上下飛

劉節婦

醫者妻

勤苦良人學煉丹
丹成早已攝飛鸞
姮娥亦仗刀圭力
不恨單栖向廣寒

趙節婦

縣尹妻

夫子曾彈單父琴
琴聲忽斷杳沉沉
夜深一掬寒窓淚

莫聽秋風別鶴吟

送夏學正赴奉聖州

書卷囊衣共一車
出關千里漫風沙
祥雲五色天西角
喜及高秋望翠華

又

弓刀射獵古雲中
聲教明時萬里同
莫向果園誇異品
賸栽丹桂待秋風

趙子固畫梅

千樹西湖浸碧漪
醉拈玉笛遶花吹
祇今無限淒涼意
留得春風雪一枝

方方壺道士為危太朴畫雲林圖二首

抱朴先生學大還
偶然為客未歸山
迎陽坊里看圖罷
夢遶白雲青樹間

又

海上三山樓觀開
壺仙早晚御風回
畫成定勝人間境
為問何因寄得來

崇術堂前棠梨

西廡棠梨一樹遮諸生長候夕陽斜清明休暇無人過
落盡風前玉雪花

張果對御圖

多欲求仙亦已痴老翁幻怪等兒嬉騎驢却向何山去
不救青螺蜀道時

送人歸宣城

聞道宣城劫火餘城東民屋半蕭疎舊時錄事今頭白

自寫平安父老書

盱江朱孟章母壽詩卷

杏園晏罷三春雨
萱草歸看五月花
想見瑤池迎阿母
麻姑山下擁雲車

送人之蘇杭

江國蕭條劫火遺
繁華無復似當時
西湖依舊舊山色
莫向秋風咏黍離

又

吳鄉水落稻平疇
蓴菜鱸魚滿意秋
為問西風斜日裏
有誰能泛五湖舟

郭天錫雲岫圖

撩亂春雲雜曉嵐
時于湧雪出青藍
依稀一筆誰傳與
北固山前海岳菴

送人之宣城

昭亭山下宛溪頭
楊柳芙蓉岸岸秋
總是舊時迎送處
夢魂猶逐故人舟

宋高宗書杜陵驄馬行

江沱燕息共恬熙無復中原壯志馳
眼見騏驎死刀下不須更寫杜陵詩

賜志忠

宋顯夫司業出乃兄誠夫尚書中秋五首并達兼善侍郎詩因次其韻

夜良清尊一笑開水邊亭榭禁城隈
祇今惟有青天月曾照當時太白來

又

曲江聯轡踏春雲二十年前逐後塵今日重來隔存歿
相看祇有兩三人

又

宋公高製擬昌黎筆勢雄奇見怒猊短氣祇令人物渺
狂瀾誰障百川低

又

翠華南下拂秋天龍虎臺高古塞邊誰料江南白頭客
連宵清話對床眠

又

會稽太守出清朝
追逐揚鑣過灞橋
想見相思浙江夜
月明酒醒卧聞簫

憶建德五首

茹蘭溪頭春水生
玉峯高下雜花明
縣庭清坐無公事
閒聽遊人鼓吹聲

又

石佛岩前山逕幽
曾因禱雨得清遊
至今六月夜深夢

長見飛泉兩派流

又

石門相向立東西側過行人踏峻梯山下鴛鴦忽飛起
風吹草樹見清溪

又

水澹山平石逕斜記向城中舊時路秋風吹雨破寺涼
數日吟哦不能去

又

父老依依想未忘我無遺愛比甘棠兩亭手植間花木
五六年來幾許長

元旦朝回書事四首

朱衣高唱御樓東清漏遲遲畫景中黃繖寶幢微影動
一時吹面受東風

又

初聞鼙鼓叫雲清次第春雷萬鼓鳴最愛鳳笙形製別
衆中不識是何聲

又

金犀千列炤春雲
綴迹猶容蟻虱臣
白獸尊前那得到
遙看拜舞但隨人

又

朝散紛紛下紫微
揮鞭爭道疾如飛
同來各向朱門去
祇有西山伴我歸

閏二月朔日

病過春光兩月程
幾番風雨幾番晴
不知開到何花樹

今日纔聞燕子聲

三月十六日至二十一日雨不止

閉關因病得深居客至猶嗔禮缺疎連日雨深無一跡
且拈丹筆了殘書

禮部集卷九